

Ny Valosoa sy hadihady

Misy tsy maty manota tokoa ny mpitondra ankehitriny

Tsy misy afaka mandà intsony amin'izao fotoana izao, fa misy tsy maty manota tokoa ao amin'ny toponandraikitra isan'ambaratom-pitantanana eto amin'ny Firenena. Tsy tokony hadinoina fa efa foana ny hamehana ara-pahasalamana, izay naraotin'ny mpitondra nanaovany izay tiany natao. Tapa-bolana lasa izay no nanafonana ity hamehana ity, ka tsy azo ekena intsony ny mbola hanohizan'ireo nampindramin'ny vahoaka fahefana ireo ny fanao mamohitra sy fiheverana ny mpiray Tanindrazana ho « dondrona » tokoa, araka ny famaritana nataon'izy ireo. Tsy adino ireo minisitry nongotana teo amin'ny toerany, noho ny fitsikerana tamin'ny tambazotran-tserasera ny adalàna nataony. Nisy koa ny nihàran'izany fitsikerana izany, noho ny fahotana mahafaty nataony tany aloha tany. Amin'izao fotoana izao dia mitohy tsy ankijanona ny fitakiana ny fanalàna, na ny fanesorana, na fametraham-pialàn'ny minisitry ny Serasera sy ny Kolontsaina sy ny sekretera jeneralin'ny Minisiteran'ny Angôvo vadiny. Ny alakamisy alina dia mbola nitaky izany, tao amin'ny fahitalavitra tsy miankina iray, no namoaka ity raharaha basy nipoaka ity voalohany, satria ny filankevitry ny minisitry ny alarobia lasa teo dia nanendry toponandraikitra ambony any amin'ny minisitera sasany any, fa tsy sahy nanisy resaka momba ity raharaha ity mihitsy. Toa midika izany fa ny filohan'ny Repoblika, ny Praministra sy ireo mpikambana ao amin'ny governemanta roambitelopolo dia miara-manaiky, fa samy manana ilay « zo tsy azo enjehina » (immunité) sahala amin'ny parlemantera rehefa eo am-perinasa. Ny minisitry vehivavy moa dia, angamba, efa manaiiky ny antson'ny minisitry ny serasera tsy hilefitra, fa hijoro satria nandray andraikitra. Izany tokoa, angamba, no manamarina ilay fitenena vahiny « solidarité féminine » ary tafiditra ao anatin'ity sokajin'olona ity koa ireo lehilahy rehetra ao amin'ny governemanta matoa tsy misy manohitra. Izany

tokoa, angamba, no fampisehoana ny firaisankinan'ny governemanta (solidarité gouvernementale) na firaisana tsikombakomba amin'ny ratsy ary satria azo antoka fa ho fanao lasa azo haverina amin'ny ho avy (jurisprudence) izany. Azo antoka koa fa tsy misy velively ny famotorana ara-moraly (enquête de moralité) natao tamin'ireo olom-boatendry mialohan'ny fanendrena azy ireo. Manaporofy izany ny fanendrena ilay minisitry ny Harena Ankaborin'ny Tany nametra-pialàna valoambiefapolo ora taorian'ny fanendrena azy, sy ilay tale jeneraly vao notendrena tamin'ny filankevitry ny minisitry farany teo, izay namoahan'ny tambazotran-tserasera ny korotam-by taritarihany ora vitsy taorian'ny nanendrena azy. Azo eritreretina ihany koa, fa matahotra ny filohan'ny Repoblika avy koa ny mpikambana ao amin'ny governemanta, satria izy no nanendry azy ireo, ka hananany trosa ara-moraly. Fantatra ihany koa fa tsy sarotra ho an'ny filohan'ny Repoblika ny hanome baiko hamoronana antontan-taratasy fanamelohana izay miseho manohitra ny heviny. Raha midradradra ny mpitondra fa « masina ny Tanindrazana » dia midika izany fa ny « fahamarinana » sy ny « fahamasinana » izany no tsy maintsy manjaka eto, kanefa tsy hita na aiza na aiza eny anivon'ny sehatry ny fitantanana ny Firenena no manjaka ireo fepetra ara-pitantanana ireo. Tsy fahaiza-miasa sa mampiasa ny fahaiza-manao amin'ny fanodinkodinana no ataon'ny mpitondra, satria dia mitokona indray ny any amin'ny Anjerimanontolo, Andrianjato, ao Fianarantsoa. Ny mahavariana dia tsy manan-katao hafa tsy ny mamono afo izao mpitondra izao, ka rehefa mirehitra ny afo vao mitady rano amonana izany. Efa manaraka akaiky ny fomba fiasan'ny mpitondra ary tsy azo badoina intsony ny olompirenena maro, ka na inona na inona fanampena-maso atao dia tsy mahataitra ary tsy manova ny fahitany ny fomba fitantanana tsy mahomby intsony izany.

Andry Tsiavalona

ELIANA BEZAZA

Tsy adim-poko ny rafitra Federaly hisian'ny fitsinjaram-pahefana tena izy

Vahinin'ny fandaharana "Sahia Lasa Zao" tao amin'ny Radio Mada, ny Radio MBS ary ny televizionina MBS omaly alina, ny sekretera nasionalin'ny antoko PSD Eliana Bezaza, izay tsy iza fa zafikelin'ny filoha Philibert Tsiranana, filohan'ny Repoblika voalohany, nitondra an'i Madagasikara taorian'ny nahazoantsika ny fahaleovantena. Tao anatin'izany no niresahana mikasika ny vehivavy manao politika, sy ny fiainan-pirenena amin'ny ankapobeany ary ny zavamisy any Mahajanga sy ny fanitra Sofia fiaviany. Ny antoko PSD dia mbola tsy nifidy niaraka amin'ny mpanohitra hatreto, saingy efa mahatsapa izahay hoy Eliana Bezaza, fa efa ampy ny 100 andro nanomezana ny fitondrana ireo fe-potoana, ka tsy nitene-nany mihitsy, satria sarotra ny mitondra firenena. Ankehitriny efa misasaka mahery ny fotoam-piasan'ny mpitondra nefa tsy misy tanteraka ny fampantantenana izay natao. Mikasika ny any Sofia tanindrazany dia nanambara ny sekretera nasionalin'ny antoko PSP Eliana Bezaza, fa manjaka ny tsy fandriampaha-



Eliana Bezaza (afovoany), tao amin'ny fandaharana Sahia Lasa Zao.

lemana, nefa governora mpitari-tafika no any antoerana. Ny fampantantenana nataon'ny mpitondra fanjakàna toy ny hananganana Oniversite any Anahidrano distrikan'Antsohihy, tanindrazan'ny filoha Dadabe Tsiranana, efa hoe herintaona lasa izao ny 14 oktobra 2020 fahatsiarovana ny nijoroan'ny Repoblika teto Madagasikara, bozaka no lava be maniry, fa tsy misy zavatra mandeha hatramin'izao. Ao Mahajanga dia manao zavatra tsy mifanaraka amin'ny filan'ny mponina, fa tombontsoa an'olon-tokana no omena tombondahiny. Raha resaka demokrasia eto Madagasikara dia tsy manjaka ny demokrasia amin'ny fanagadragàna olona maneho hevitra. Ny haino amanjerim-panjakàna toy ny RNM sy TVM

dia voarara tsy azo idiran'ny olona heverina ho tsy mitovy hevitra amin'ny fanjakàna. Raha nilaza ny mpitondra ankehitriny, fa tsy nisy zavabitan'ireo mpitondra nifandimby teto nandritra ny 60 taona, fa izao vao manarina ny tsy vitan'ny teo aloha dia tokony havadibadika ihany ny lela vao miteny, satria manjary any aminao no mifatra ny zavatra rehetra hoy izy. Maro ny zavabitan'ny mpitondra teo aloha ary tsy ho voafafa izany na takonana aza. Mikasika ny governemanta dia hita fa tsy manana olona ity fitondrana ity. Maro ny zavatra tsy fampiseho masoandro hita ao araka ny hita amin'ny gazety sy tambazotran-tserasera. Fa raha ny tokony hitondrana ny firenena ankehitriny indray dia tokony ho rafitra

federalista hisian'ny fitsinjaram-pahefana tena izy, mba hahazo tombontsoa avokoa ny Malagasy 25 tapitrisa, no tokony ham-piharina eto Madagasikara hoy ihany ity mpanao politika vehivavy ity. Mahakasika izay indrindra dia tokony hoesorina ao antanana ny resaka adim-poko, satria izay foana no voizina hoy Eliana Bezaza raha vao miresaka io rafitra federaly io. Tokony hahazo tombontsoa ny zavatra misy any amin'ny toerana misy azy ny Malagasy tsirairay. Rehefa hanao taratasy mikasika ny hazan-dranomasina ohatra dia tsy maintsy aty Antananarivo no manao ny taratasy rehetra, nefa tokony ho vita any Mahajanga izany hoy izy. Raha akapoka ny nambaran'ny sekretera nasionalin'ny antoko PSD Eliana Bezaza dia tsy manome naoty ity fitondrana ity ny tenany. Hita ny tsy fijeren'ny mpitondra amin'izao ny lafiny sosialy, izay nampivavaka ny antoko PSD tamin'ny fotoana nitondran'ny. Politikan'ny kibo no nanjaka tamin'izany ; tsy nandoa vola ny mpiandrahy ary ny fitsaboana maimaimpoana.

Ny Valosoa

Antso Fiarahamonina Kristianina (AFK)

Hanatanteraka fihonana

« pré-colloque »

Efa miroso tanteraka amin'ny fanombohana ny fanatanterahana ny vina natolony, ho an'ny firenena amin'izao fotoana izao ny Antso Fiarahamonina Kristianina (AFK). Taorian'ny fikaonan-doha « Symposium » nataony teny amin'ny Le Pavé Antaninarenina ny 14 Septambra lasa teo, dia miditra amin'ny dingana manaraka dia ny amin'ny « Pré-colloque » indray ny fikambanana. Ny talata 21 Septambra ho avy izao, no hanatontosany izany eny amin'ny CNPC Antanimena eo akaikin'ny ny fiangonana FJKM Antanimena Atsinanana, hanomboka amin'ny 9 ora sy 15min maraina ary haharitra hatramin'ny tolakandro. Izao hetsika izao dia ho fiomanana amin'ny fanatanterahana ny fanatrarana ny tanjona dia hanarina sy hamoaka ny firenena ao anatin'izao fahatrarana lalina manjova azy izao. Avotran'ny AFK hatrany amin'ny fitsinjavana ny hametrahana ny vina iraisana manerana ny firenena, dia i Madagasikara ho lasa Fiarahamonina misy firaisan'aina (Symbiotique), sy mampisy firaisan'aina (Symbiotisant). Ao anatin'izany ihany koa ny famerenana ny hasin'ny tena fihavanana maha malagasy, fa tsy amin'ny endriny iheverana azy ankehitriny. Voizina ao anatin'ny fanatanterahana ny vina ezahiny hotanterahina izay, ny amin'ny fiarahamonina tsy misy fanambakana, tsy mifampitsentsitra, fa mifampitsinjy sy mifanohana, mifamelona, mifanome tana, ary mifampivelatra. Fiarahamonina tena ilain'ny vahoaka malagasy ankehitriny, no katsahin'ny AFK hapetraka amin'izao fotoana izao, satria efa nanaovana fanadihadiana lalina izany, fa ny manainga no sisa ary mitaky fandraisana andraikitra sy finiavana avy amin'ny olompirenena tsirairay. Azo antoka tanteraka ny hivoahan'ny Madagasikara ao anatin'izao toerana misy azy izao, raha resy lahatra ny vahoaka malagasy manerana ny Nosy. Ny andrasana sisa dia fiaraha-mientana avy amin'ny rehetra. Anisan'ny mampiavaka izao vina tanterahan'ny AFK izao dia ny tsy fianteherana na kely aza amin'ny mpamatsy vola vahiny, fa ny eo ampelatanana no ampasaina. Ny talentan'ny tsirairay ihany koa no velarina ao anatin'izany, noho ny fanomezandanja ny lafiny maha olona sy ny tsirairay mihitsy. Asaina araka izany ny olom-pirenena izay mahatsapa ny amin'ny halehiben'ny izao vina izao, izay tsihivina fa tolo-tsaina avy amin'Andriamanitra izany ary natolony ho tanterahin'izy ireo, hanatrika izany fihonana lehibe izany.

Tsihivina fa ny Antso Fiarahamonina Kristianina dia fikambanana misehatra eo anivon'ny fiarahamonina, ho fampandrosoana ny firenena. Misokatra ho an'ny rehetra noho izany ny fikambanana, na eny anivon'ny fitandremana, ny Orinasa, ny "ONG", sns... Marihina ihany koa fa tsy antoko politika, na antokom-pivavahana velively ny Antso Fiarahamonina Kristianina.

Radafy

TOMONKALO

Tsy handray karama telo volana ?

Manam-be tokoa `nareo ka inona àry moa ny olana, Ny amin'ny hoe tsy handray karama hatramin'ny roa na telo volana ?
Ny anareo koa raha ny bizina, efa fantatray ihany, Fa miliara anie no «ketrika» mihodinkodina amin'izany !

Iza izao `nareo mpitondra ankehitriny no naato, Noho ny halatra vaventy izay nitranga tato ho ato? Anareo ny fitondrana, anareo ny fitsarana, Ka `nareo moa ve hanahy ny hoe ho any am-pigadrana?

Tsisy rantsam-pitsarana mba manadihady lalina, Hany ka manararaotra toy ny banga mihomehy alina? Ilay birao mahaleotena, anarany ny hoe "birao", Fa ao `nareo no mialokaloka sy manao ny tsy fanao ?

Dia mitohy ny laingalainga sy karazam-pamitahana, Ary mody mba mizara fa izany no idedahana ? Fanomezana madio sy mba mitohy re no alefaso, F'aoka izay ny faikafaika sy karazan-tampi-maso !

Aminay dia toy ny sisa eny an-databatry ny mpanana, Ilay ampahana karama izay afafy toa voan'anana. Ka tsy zavatra toy izany, entina ho "fitanana aina", Fa ny tetikasa matotra sy mitohy no tena ilaina !

DADAN'i ZINA (17-10-21)